



REPUBLIKA E SHQIPËRISË
KOMISIONI QENDROR I ZGJEDHJEVE

Komisioni i Ankimimeve dhe Sanksioneve

Data: 08.05.2023

Nr: 84

Ora: 14:10

VENDIM

**PËR SHQYRTIMIN E KËRKESËS NR. 21, DATË 06.05.2023 TË KOMISIONERIT SHTETËROR TË
ZGJEDHJEVE**

Komisioni i Ankimimeve dhe Sanksioneve në mbledhjen e datës 08.05.2023, me pjesëmarrjen e:

Elvis	ÇEFA	-	Relator
Elvin	LAKO	-	Anëtar
Ilirjan	RUSMALI	-	Anëtar
Koli	BELE	-	Anëtar
Ledio	BRAHO	-	Anëtar

Shqyrtoi çështjen me:

KËRKUES: Komisioneri Shtetëror i Zgjedhjeve

PALË E INTERESUAR: Z. Julian Uzeir, përfaqësues i bashkisë Konispol



OBJEKT: Kërkesë për vendosje sanksioni administrativ gjobë në masën 3 000 (tre mijë) lekë ndaj: Z. Arif Tafani, kryetar në bashkinë Belsh; Z. Lefter Alla, kryetar në bashkinë Bulqizë; Z. Andis Salla, kryetar në bashkinë Cërrik; Z. Armando Subashi, kryetar në bashkinë Fier; Z. Gledian Llatja, kryetar në bashkinë Elbasan; Z. Klodian Taçe, kryetar në bashkinë Gramsh; Z. Redjan Krali, kryetar në bashkinë Kavajë; Z. Klement Ndoni, kryetar në bashkinë Këlcyrë; Z. Erion Isai, kryetar në bashkinë Kolonjë; Z. Shuaip Beqiri, kryetar në bashkinë Konispol; Z. Safet Gjici, kryetar në bashkinë Kukës; Z. Pjerin Ndreu, kryetar në bashkinë Lezhë; Z. Kastriot Gurra, kryetar në bashkinë Librazhd; Zj. Eriselda Sefa, kryetar në bashkinë Lushnje; Z. Qerim Ismailaj, kryetar në bashkinë Mallakastër; Z. Nuri Belba, kryetar në bashkinë Prrenjas; Z. Pali Kolefski, kryetar në bashkinë Pustec; Zj. Majlinda Bufi, kryetar në bashkinë Roskovec; Z. Elton Arbana, kryetar në bashkinë Shijak.

BAZË LIGJORE: Neni 19, pika 1, shkronja “c” dhe neni 21, pika 1, shkronja “dh” të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar.

Rrethanat e çështjes:

1. Komisioni Qendror i Zgjedhjeve ka marrë indicie për publikimin e postimeve me përmbajtje elektorale nga 20 (njëzet) bashki dhe 1 (një) kryetar bashkie, për të cilat pretendohet nga denoncuesi se postimet me përmbajtje partiake në faqet zyrtare të bashkive përbëjnë përdorim të burimeve publike. Denoncimet janë marrë nëpërmjet provave link dhe materialeve fotografike, të administruara nga Komisioni Qendror i Zgjedhjeve, nëpërmjet raportit të KRIIK, të datës 24 Prill 2023 “Për gjetjet dhe rekomandimet për javën 14 Prill- 20 Prill 2023”.
2. Në këtë denoncim pretendohet se në faqet zyrtare “Facebook” të 20 (njëzet) bashkive dhe të 1 (një) kryetari bashkie janë përdorur slogane elektorale, në formën e hashtag (#) në mbështetje të Partisë Socialiste të Shqipërisë.

3. Mbi këtë bazë, Komisioneri ka nisur hetimin administrativ ndaj Z. Arif Tafani, kryetar në bashkinë Belsh; Z. Lefter Alla, kryetar në bashkinë Bulqizë; Z. Andis Salla, kryetar në bashkinë Cërrik; Z. Armando Subashi, kryetar në bashkinë Fier; Z. Gledian Llatja, kryetar në bashkinë Elbasan; Z. Klodian Taçe, kryetar në bashkinë Gramsh; Z. Redjan Krali, kryetar në bashkinë Kavajë; Z. Klement Ndoni, kryetar në bashkinë Këlcyrë; Z. Erion Isai, kryetar në bashkinë Kolonjë; Z. Shuaip Beqiri, kryetar në bashkinë Konispol; Z. Safet Gjici, kryetar në bashkinë Kukës; Z. Pjerin Ndreu, kryetar në bashkinë Lezhë; Z. Kastriot Gurra, kryetar në bashkinë Librazhd; Zj. Eriselda Sefa, kryetar në bashkinë Lushnje; Z. Qerim Ismailaj, kryetar në bashkinë Mallakastër; Z. Nuri Belba, kryetar në bashkinë Prrrenjas; Z. Pali Kolefski, kryetar në bashkinë Pustec; Zj. Majlinda Bufi, kryetar në bashkinë Roskovec; Z. Elton Arbana, kryetar në bashkinë Shijak; Z. Adriatik Zotkaj, kryetar në bashkinë Poliçan, si dhe Z. Blerim Shera, kryetar në bashkinë Vorë. Në përfundim të hetimit administrativ, Komisioneri ka arritur në konkluzionin se 19 kryetarë bashkie kanë shkelur pikën 1, të nenit 91 të Kodit Zgjedhor, pasi kanë vënë në dispozicion faqet zyrtare “facebook” të institucioneve publike që drejtojnë, për të publikuar postime me përmbajtje hashtag, slogane apo thirrje të karakterit elektoral/politik, duke promovuar kështu subjektin zgjedhor “Partia Socialiste e Shqipërisë” për zgjedhjet vendorë të datës 14 Maj 2023.
4. Me anë të vendimit nr. 441, datë 05.05.2023, Komisioneri Shtetëror i Zgjedhjeve ka vendosur t’i propozojë Komisionit të Ankimimeve dhe Sanksioneve marrjen e masës administrative, gjobë në vlerën 3 000 (tre mijë) lekë për 19 kryetarët e bashkive si edhe ka urdhëruar fshirjen e menjëhershme nga faqet zyrtare të rrjetit social “Facebook”, të secilës bashki, të çdo postimi apo ripostimi në të cilat janë përdorur hashtag me përmbajtje elektorale.
5. Komisioneri ka vënë në lëvizje KAS-in me anë të një kërkesë, duke kërkuar marrjen e masës administrative me gjobë ndaj kryetarëve të bashkisë Belsh, bashkisë Bulqizë, bashkisë Cërrik, bashkisë Fier, bashkisë Elbasan, bashkisë Gramsh, bashkisë Kavajë, bashkisë Këlcyrë, bashkisë Kolonjë, bashkisë Konispol, bashkisë Kukës, bashkisë Lezhë, bashkisë Librazhd, bashkisë

Lushnje, bashkisë Mallakastër, bashkisë Prrenjas, bashkisë Pustec, bashkisë Roskovec, si dhe bashkisë Shijak në masën 3 000 (tre mijë) lekë, duke e mbështetur këtë propozim në nenin 171 pika 1 e Kodit Zgjedhor.

6. KQZ caktoi me short anëtarin e KAS-it z. Elvis Çefa relator për shqyrtimin e kërkesës nr. 21, datë 06.05.2023 të Komisionerit. KAS në seancën paraprake vendosi pranimin për shqyrtim të kërkesës, duke e caktuar seancën e shqyrtimit më datë 08.05.2023, ora 13:45.
7. Seanca e datës 08.05.2023 u zhvillua me praninë e Sekretarit të Përgjithshëm të KQZ-së, si përfaqësues i Komisionerit Shtetëror të Zgjedhjeve dhe të specialistëve të administratës së KQZ-së. Kryetarët e bashkive në fjalë, të njoftuar rregullisht, nuk u paraqitën në seancën e shqyrtimit.
8. Në seancën e shqyrtimit mori pjesë në cilësinë e palës së interesuar z. Julian Uzeir, përfaqësues i bashkisë Konispol, i cili kërkoi rrëzimin e kërkesës nr. 21 të Komisionerit, me pretendimin se postimi është kryer nga përfaqësuesit e takimit ku kryetari I bashkisë kishte marrë pjesë dhe bashkia Konispol vetëm e ka rishpërndarë atë. Bashkia Konispol e ka fshirë postimin. Z. Uzeir sqaroi se personi i cili administron faqen zyrtare “Facebook” të bashkisë Konispol nuk ka njohuritë e duhura ligjore për të kuptuar që ky ripostim bie ndesh me nenet e Kodit Zgjedhor, dhe për rrjedhojë nuk ka përgjegjësi direkte kryetari i bashkisë në fjalë.
9. KAS-i mori në shqyrtim dhe administroi këto prova shkesore:
 - Kërkesën nr. 21, datë 06.05.2023 të Komisionerit;
 - Vendimin nr. 441, datë 05.05.2023 të Komisionerit, “Për shqyrtimin administrativ të denoncimit nr. 349 ID, të Koalicionit për Reforma, Integrim dhe Institucione të Konsoliduara ndaj Kryetarit të Bashkisë Belsh, Bulqizë, Cërrik, Elbasan, Fier, Gramsh, Kavajë, Këlcyrë, Kolonjë, Konispol, Kukës, Lezhë, Librazhd, Lushnje, Mallakastër, Poliçan, Prrenjas, Pustec, Roskovec, Shijak dhe Vorë për shkelje administrative, në zgjedhjet për organet e qeverisjes vendore të datës 14 Maj 2023”.

- Denoncimin nr. 349 ID të KRIIK,
- provat materiale fotografike bashkëlidhur.

Në përfundim të shqyrtimit administrativ dhe të vlerësimit të provave dhe pretendimeve përfundimtare,

KAS-i konstaton se:

1. Kërkesa e Komisionerit për vendosjen e sanksionit administrativ ndaj 19 kryetarëve të bashkive të sipërcituar, bazuar në denoncimin me nr. 349 ID të Koalicionit për Reforma, Integrim dhe Institucione të Konsoliduara (KRIIK), ka si shkak postimet në faqet zyrtare "Facebook" të bashkive të drejtuara nga ata, të cilat janë përdorur për të publikuar postime me përmbajtje hashtag (#), sloganesh apo thirrjesh të karakterit elektor/politik, duke promovuar kështu subjektin zgjedhor "Partia Socialiste e Shqipërisë" për zgjedhjet vendore të datës 14 Maj 2023.
2. Faqet zyrtare të institucioneve publike në rrjetet e ndryshme sociale (facebook, tëiter, instagram etj.) bëjnë pjesë në kategorinë "asete", në kuptim të pikës 2 të nenit 91 të Kodit Zgjedhor, pra ato janë "burime" të institucionit në kuptim të kësaj dispozite. Kjo do të thotë se faqet zyrtare të bashkive në rrjetet e ndryshme sociale të sipërcituara, nuk mund të përdoren ose të vihet në mbështetje të kandidatëve, të partive politike ose të koalicioneve në zgjedhje.
3. Pika 1 e nenit 91 të Kodit Zgjedhor përcakton se *"...nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve apo enteve publike në nivel qendror ose vendor, apo çdo lloj enti tjetër ku shteti zotëron kapitale apo kuota ose/dhe emëron shumicën e organit mbikëqyrës apo organit administrues të entit, pavarësisht nga burimi i kapitalit ose pronësia"*. Ky ndalim është konfirmuar edhe nga vendimi i Rregullatorit nr. 9, datë 24.12.2020, i cili në përkufizimin e

“veprimtarive të ndaluara” ndaloni “vënien në dispozicion të aseteve të luajtshme dhe të paluajtshme ... për **qëllime zgjedhore**”.

4. Ndërkohë, pika 1 e nenit 171 të Kodit Zgjedhor, në të cilën Komisioneri Shtetëror i zgjedhjeve është bazuar në propozimin e masës administrative ndaj personave përgjegjës, përcakton sanksionin për shkeljet e kryera “nga anëtarët e komisioneve të zgjedhjeve ose nga **persona të ngarkuar me detyra, sipas këtij Kodi**”. Personat e ngarkuar me detyra formojnë një listë personash/institucionesh të cilët janë ngarkuar me detyra nominalisht nga Kodi Zgjedhor. Të tillë janë p.sh. vëzhguesit a perfaqësuesit e subjekteve zgjedhore në KQZ (për etikën e punës e të komunikimit), Drejtoria e Përgjithshme e Gjendjes Civile (për dërgimin e të dhënave nga regjistri për ndarjen e zonave të administrimit zgjedhor, për listën e zgjedhësve etj), zyra e gjendjes civile dhe kryetari i bashkisë (për listën e zgjedhësve), kryetari i bashkisë (për caktimi e qendrave të votimit), Ministri që ka në varësi shërbimin e gjendjes civile (për nxjerrjen e urdhërave për listat dhe zonat e qendrave të votimit) etj. Fakti se ata dhe detyrat e tyre përcaktohen nga Kodi do të thotë se lista e tyre është e fundme dhe nuk mund të shtohet me ndonjë akt tjetër ligjor ose nënligjor. **Titullari i institucionit apo entit që ka në administrim asetin publik nuk bën pjesë në listën e “personave të ngarkuar me detyra, sipas Kodit”**. Për këtë arsye, KAS çmon se ankioni për të nuk mund të vendoset sipas pikës 1 të nenit 171 të Kodit Zgjedhor.
5. Për keqpërdorimin e burimeve publike Kodi Zgjedhor ngarkon me përgjegjësi edhe subjektet zgjedhore përfituese. Kodi Zgjedhor, në pikën 20 të nenit 2 përcakton se “**subjekte zgjedhore**” janë **partitë politike, koalicionet dhe kandidatët e propozuar nga zgjedhësit, si dhe kandidatët për kryetarë të organeve të qeverisjes vendore, të regjistruar në përputhje me këtë Kod**”. Për shkak se kandidati për kryetar bashkie trajtohet nga Kodi si subjekt zgjedhor i mëvetshëm, si dhe për shkak se postimet e aksesueshme në facebook bëjnë fjalë për veprimtari elektorale të tyre dhe jo të subjektit që e mbështet, atëherë për këto shkelje duhen trajtuar subjekt zgjedhor përfitues, kandidatët dhe jo partia politike që i mbështet ato.

6. Kandidatët për kryetar bashkie objekt i këtij procedimi administrativ, kanë qenë në dijeni të publikimit të slloganeve politico-elektorale në faqet zyrtare të rrjeteve sociale të bashkive të tyre. Publikimet në fjalë kanë qartësisht si qëllim sensibilizimin politik të publikut. Në kushtet kur ata gëzojnë cilësinë e subjektit zgjedhor si kandidatë për kryetar bashkie, është e qartë se publikimet në shkelje të ndalimeve në Kodin Zgjedhor, janë kryer në favor të tyre. Në këto rrethana ata kanë pasur detyrimin për ndërprerjen e menjëhershme të shkeljes, gjë që nuk ka ndodhur.
7. Përgjegjësia për vendosjen në përdorim apo në mbështetje të kandidatëve apo të subjekteve zgjedhore të faqeve zyrtare të institucioneve publike është e kryetarit të bashkisë. Këtë e saktëson vendimi i Rregullatorit nr. 9, datë 24.12.2020, nëpërmjet shkronjave “a” dhe “dh’ të pikës 1 të nenit 7. Gjithësesi, KAS-i konstaton se KQZ-ja nuk ka sensibilizuar në kohë publikisht, sikurse nuk ka paralajmëruar institucionet për largimin nga praktika e vjetër e përdorimit politik të faqeve të institucioneve në rrjetet sociale.
8. Pika 1 e nenit 172 të Kodit Zgjedhor përcakton se *“subjektet zgjedhore kryejnë kundërvajtje administrative në rastet kur në favor të tyre kryhen shkelje të ndalimeve të përcaktuara në dispozitat e këtij ligji dhe subjektet zgjedhore, pas marrjes dijeni, nuk marrin masa të menjëhershme për ndërprerjen e shkeljes”*. Kjo do të thotë se **hetimi administrativ për keqpërdorimin e burimeve publike duhet të shoqërohet në çdo rast edhe me hetimin për rolin e subjektit zgjedhor përfitues nga veprimtaria**. Në përfundim të hetimit administrativ si Komisioneri, ashtu dhe KAS-i duhet të mbajnë qëndrim dhe vlerësim të shprehur për këtë rol.
9. Kandidatët për kryetar bashkie të ngarkuar me përgjegjësi sipas vendimit nr. 441, datë 05.5.2023 të Komisionerit Shtetëror të Zgjedhjeve, gëzojnë status të dyfishtë, si kandidatë dhe si kryetarë në detyrë të bashkive përkatëse. Si kryetar të bashkive, personat në fjalë kanë akses, dijeni dhe përgjegjësi për postimet në faqen zyrtare të bashkive që ato drejtojnë. Ato kanë të gjithë pushtetin e nevojshëm ligjor për të urdhëruar ndërprerjen e shkeljes së ligjit dhe për të marrë masa që kjo sjellje të mos përsëritet. Fakti që ata nuk e kanë ushtruar këtë pushtet deri ditën e urdhërimit nga Komisioneri do të thotë se ata duhet t’i nënshtrohen, në

cilësinë e subjektit zgjedhor, veprimit të sanksionit të parashikuar nga pika 1 e nenit 172 të Kodit Zgjedhor.

10. Bazuar në këtë analizë të fakteve dhe të kuadrit ligjor, KAS-i çmon se kryetarët e bashkive, në cilësinë e tyre si kandidatë për kryetar bashkie, si subjekte zgjedhor përfitues nga keqpërdorimi i faqeve zyrtare të institucionit në rrjetin social facebook, duhet të mbahet përgjegjës për shkelje të parashikuar nga pika 1 e nenit 172 të Kodit Zgjedhor.
11. Nuk mund të bëhet i njëjti arsyetim për subjektin zgjedhor “Partia Socialiste” që mbështet kandidatët në fjalë. Gjatë shqyrtimit të kërkesës në KAS, si përfaqësuesit e administratës, po ashtu dhe nuk sollën prova për të vërtetuar faktin nëse Partia Socialiste ka qenë apo jo në dijeni të zhvillimit të këtyre aktiviteteve në kushtet e ndalimit nga Kodi Zgjedhor.
12. Ndërkohë, përrsa i përket caktimit të masës së sanksionit, KAS-i çmon se duhet t’i japë peshën që i takon faktit se ende nuk ka perceptim të qartë ndër aktorët se përdorimi i adresës zyrtare të institucionit në facebook dhe rrjetet e tjera sociale për fushatë elektorale përbën keqpërdorim të burimeve publike.
13. Ndëshkimi administrativ nuk është qëllim primar i Kodit Zgjedhor. Përpara tij vjen informimi, edukimi, paralajmërimi. Për shkak se këto mundësi KQZ-ja nuk i ka vënë në shfrytëzim për këtë tipologji shkeljesh, KAS-i vlerëson se nuk duhet të sanksionohen në kuptim të pikës 2 të nenit 171 të Kodit Zgjedhor për z. Lefter Alla, kryetar në bashkinë Bulqizë; z. Klodian Taçe, kryetar në bashkinë Gramsh; z. Shuaip Beqiri, kryetar në bashkinë Konispol; z. Kastriot Gurra, kryetar në bashkinë Librazhd, të cilët nuk rikandidojnë më për ato poste.
14. Në lidhje me të drejtën e ankimit, sa i përket personave të sanksionuar, duke qenë se ata janë dënuar administrativisht në cilësinë e subjektit zgjedhor, në zbatim të nenit 145 pika 1 të K.Zgjedhor që parashikon se *“Subjektet zgjedhore kanë të drejtë të bëjnë ankim në Kolegjin Zgjedhor të Gjykatës së Apelit, Tiranë kundër vendimeve të KQZ-së, kur ato cenojnë interesat e tyre të ligjshëm brenda afatit të përcaktuar në nenin 152 të këtij Kodi”*, ata mund ta ushtrojnë të drejtën e ankimit pikërisht duke ju drejtuar Kolegjit Zgjedhor pranë Gjykatës Administrative

të Apelit. Duke qenë se ky vendim është marrë në periudhën e cila fillon 48 orë pas dekretimit të zgjedhjeve deri në përfundim të shqyrtimit administrativ të ankimit për zgjedhje, atëherë ankimi bëhet brenda 5 ditëve nga shpallja e këtij vendimi. Ky qëndrim mbështetet dhe në praktikën e Kolegjit Zgjedhor që e ka pranuar kompetencën për shqyrtimin e dënimeve administrative ndaj subjekteve zgjedhore, më konkretisht në vendimin nr. 3, datë 09.03.2023.

PËR KËTO ARSYE:

Bazuar në nenin 21, pika 1, shkronja 'dh', të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, Komisioni i Ankimimeve dhe Sanksioneve

V E N D O S I:

1. Pranimin e pjesshëm të kërkesës nr. 21, datë 06.05.2023 të Komisionerit Shtetëror të Zgjedhjeve.
2. Vendosjen e sanksionit administrativ gjobë në masën 100 000 (njëqind mijë) lekë, bazuar në nenin 172, pikën 1, të ligjit 10019, datë 29.12.2008 "Kodi Zgjedhor i Republikës së Shqipërisë, i ndryshuar", në cilësinë e subjektit zgjedhor ndaj:
 - z. Arif Tafani, kryetar në bashkinë Belsh.
 - z. Andis Salla, kryetar në bashkinë Cërrik.
 - z. Armando Subashi, kryetar në bashkinë Fier.
 - z. Gledian Llatja, kryetar në bashkinë Elbasan.
 - z. Redjan Krali, kryetar në bashkinë Kavajë.
 - z. Klement Ndoni, kryetar në bashkinë Këlcyrë.
 - z. Erion Isai, kryetar në bashkinë Kolonjë.
 - z. Safet Gjici, kryetar në bashkinë Kukës.
 - z. Pjerin Ndreu, kryetar në bashkinë Lezhë.
 - zj. Eriselda Sefa, kryetar në bashkinë Lushnje.
 - z. Qerim Ismailaj, kryetar në bashkinë Mallakastër.

- z. Nuri Belba, kryetar në bashkinë Prrenjas.
 - z. Pali Kolefski, kryetar në bashkinë Pustec.
 - zj. Majlinda Bufi, kryetar në bashkinë Roskovec.
 - z. Elton Arbana, kryetar në bashkinë Shijak.
3. Rrëzimin e kërkesës së Komisionerit Shtetëror të Zgjedhjeve për z. Lefter Alla, kryetar në bashkinë Bulqizë; z. Klodian Taçe, kryetar në bashkinë Gramsh; z. Shuaip Beqiri, kryetar në bashkinë Konispol; z. Kastriot Gurra, kryetar në bashkinë Librazhd;

Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.

Kundër këtij vendimi mund të bëhet ankim në Kolegjin Zgjedhor të Gjykatës Administrative të Apelit, brenda 5 (pesë) ditëve nga shpallja e tij.

Elvis	ÇEFA	-	Relator	
Elvin	LAKO	-	Anëtar	(Mendim paralel)
Ilirjan	RUSMALI	-	Anëtar	
Koli	BELE	-	Anëtar	(Mendim paralel)
Ledio	BRAHO	-	Anëtar	

MENDIM PARALEL

1. Në shqyrtimin e kërkesës nr. 21, datë 06.05.2023 të paraqitur nga Komisioneri Shtetëror i Zgjedhjeve për vendosjen e sanksioneve administrative ndaj kryetarëve të disa bashkive, ne anëtarët Elvin Lako dhe Koli Bele, duke mos qenë dakord me masën e sanksionit administrativ, si dhe argumentet e parashtruara nga anëtarët e tjerë të Komisionit të Ankimimeve dhe Sanksioneve (KAS), jemi të mendimit se KAS nuk duhej të sanksiononte kryetarët e bashkive me gjobë në masën 100.000 (njëqind mijë) lekë, në bazë të nenit 172, pika 1 të ligjit nr. 10019, datë 29.12.2008 “Kodi Zgjedhor i Republikës së Shqipërisë”, për arsytet e mëposhtme.
 - i. Subjektet zgjedhore të kenë marrë dijeni se në favor të tyre janë kryer shkelje të ndalimeve të përcaktuara në Kod;
 - ii. Pas marrjes dijeni, nuk kanë marrë masa të menjëhershme për ndërprerjen e shkeljes.
2. Kodi Zgjedhor kërkon plotësimin e dy kushteve kumulative për aplikimin e nenit 172, pika1 :
 - i. Subjektet zgjedhore të kenë marrë dijeni se në favor të tyre janë kryer shkelje të ndalimeve të përcaktuara në Kod;
 - ii. Pas marrjes dijeni, nuk kanë marrë masa të menjëhershme për ndërprerjen e shkeljes.
3. Hetimi administrativ përpara KSHZ si dhe KAS, nuk arriti të provojë marrjen dijeni nga ana e subjektit elektoral (kryetarët e bashkive) të shkeljes objekt hetimi, por në çdo rast edhe nëse do pranohej argumenti i anëtarëve të tjerë, se si persona përgjegjës ata janë në dijeni për shkak të detyres së tyre , do duhej të hetohej dhe provohej mos marja e “masave të menjëhershme për ndërprerjen e shkeljes”. Për më tepër, nga një sondim i faqeve zyrtare të rrjetit “facebook” të bashkive subjekt i këtij vendimi, rezulton se në shumicën e rasteve postimet me karakter elektoral janë fshirë nga personat përgjegjës. Ky fakt edhe pse i pahetuar administrativisht, gjithsesi krijon bindjen se pas marrjes dijeni të shkeljes, subjekti ka marrë masat për ndërprerjen e saj.

Rrjedhimisht, duke qenë se dy kushtet kumulative nuk plotësohen, si dhe në rastet e verifikuara nga dy anëtarët e pakicës, rezulton se shkelja është ndërprerë pas marrjes dijeni, nuk mund të aplikohet neni 172, pika 1 e Kodit Zgjedhor.

4. Komisioneri ka kërkuar vendosjen e sanksionit administrativ gjobë në masën 3.000 (tre mijë) lekë referuar nenit 171, pika 1 të Kodit Zgjedhor.

Referuar vendimit nr. 45, datë 04.04.2023 të KAS, pika 1 e nenit 171 të Kodit Zgjedhor përcakton sanksionin për shkeljet e kryera “nga anëtarët e komisioneve të zgjedhjeve ose nga PERSONA TË NGARKUAR ME DETYRA, sipas këtij Kodi”. Personat e ngarkuar me detyra formojnë një listë personash/institucionesh të cilët janë ngarkuar me detyra nominalisht nga Kodi Zgjedhor. Të tillë janë p.sh. vëzhguesit a perfaqësuesit e subjekteve zgjedhore në KQZ (për etikën e punës e të komunikimit), Drejtoria e Përgjithshme e Gjendjes Civile (për dërgimin e të dhënave nga regjistri për ndarjen e zonave të administrimit zgjedhor, për listën e zgjedhësve etj), zyra e gjendjes civile dhe kryetari i bashkisë (për listën e zgjedhësve), kryetari i bashkisë (për caktimi e qendrave të votimit), Fakti se ata dhe detyrat e tyre përcaktohen nga Kodi do të thotë se lista e tyre është e fundme dhe nuk mund të shtohet me ndonjë akt tjetër ligjor ose nënligjor.

5. Përfundimisht, ne vlerësojmë se kryetarët për të cilët KAS ka vendosur sanksion administrativ, gjenden në shkelje të dispozitave të Kodit Zgjedhor, për aq kohë sa kanë publikuar postime me përmbajtje elektorale/politike në faqet e tyre zyrtare” Facebook”, por, duke qenë se kryetari i bashkisë nuk bën pjesë në rrethin e personave të ngarkuara me detyra nga Kodi Zgjedhor, kryetarët në fjalë duhen sanksionuar me masë administrative sipas nenit 171, pika 2 “Shkeljet e tjera të dispozitave të këtij Kodi, kur nuk përbëjnë vepër penale, dënohen me gjobë nga 1,000 deri në 2,500 lekë.”

Anëtarët : Elvin Lako dhe Koli Bele